

## **AER CRITICA OS FAVORITISMOS NA ORGANIZACIÓN DE EVENTOS AO AIRE LIBRE E A DEIXADEZ DE FUNCIÓNS DO GOBERNO LOCAL DE REDONDELA**



A Agrupación de Electores de Redondela vén de constatar a grave falta de responsabilidade e a existencia de favoritismos no labor do goberno local á hora da concesión de permisos para a realización de actos ao aire libre. No mes de maio, AER realizou unha serie de rexistros solicitando información sobre os seguros de responsabilidade civil obrigatorios, tal como indica o Concello de Redondela na correspondente ordenanza, e sobre o plan de evacuación de diversos actos, algúns propios do Concello e outros realizados por entidades privadas. No que respecta a algúns actos dos que é responsable o Concello de Redondela, non se proporcionou copia do Plan de Emerxencias que se require a todo tipo de actos, e remitiuse ao protocolo esixido polos mandos policiais á fronte en cada un dos eventos, protocolo que non foi aportado e que polo tanto se descoñece por completo.

Da resposta dada respecto aos eventos que se realizan durante a festividade local do Cristo, o goberno local recoñece que no que respecta a estes actos que se realizan na vía pública non se lles esixe seguro de responsabilidade civil algún. Esta situación é vista dende AER como un acto de favoritismo intolerable, sobre todo despois de ter constancia de que a numerosos programadores de eventos e de entidades privadas que organizan eventos na vía pública se lles esixe tanto seguro de responsabilidade civil como plan de seguridade, a expensas de que non se lles autorice o evento de non cumprir ditos requisitos en tempo e forma.

A esta situación de privilexios encubertos tamén hai que sumar o recente caso do descontrol que vén de aflorar coas fogueiras de San Xoán do presente ano 2016. Todas as fogueiras tiñan a obriga de realizar a correspondente solicitude de permiso contando con seguro de responsabilidade civil e dispoñendo o material o día anterior á queima, condicionado a que non se instalen materiais que conteñan substancias que poidan emitir fumes tóxicos. Sorprendente foi a actitude do goberno local á hora de publicar unha nova de prensa responsabilizando a un veciño particular da suspensión dunha das fogueiras máis coñecidas de Redondela, cando o que aconteceu realmente é que os responsables de supervisar as fogueiras non realizaran correctamente a supervisión dos permisos extraordinarios necesarios en cada caso, se o emprazamento era o axeitado ou non e se os materiais empregados nas fogueiras cumprían cos requirimentos medioambientais. Esta omisión nas súas funcións do departamento de Medio Ambiente e máis do departamento de Interior púxose en evidencia cando un veciño a nivel particular notificou ao Concello as deficiencias que el mesmo detectou. O goberno local recoñece que foi nese momento cando asumiu as súas responsabilidades e revisou as fogueiras que presentaban deficiencias e das que recibira notificación, así como tódalas fogueiras construídas e autorizadas polo Concello. Ao realizarse a última hora e a correr, de detectarse deficiencias non cabe dúbida que os organizadores non teñen marxe suficiente para corrixir con tempo esas deficiencias, sendo o goberno local o responsable inmediato de calquera cancelación ou problema na organización deste eventos tradicionais, directamente relacionados

coa súa lentitude e ineficiencia á hora de xestionar as súas responsabilidades como goberno local.

Dende AER consideramos que a situación de omisión das súas responsabilidades, o actuar a última hora a medida que lles marcan os pasos, a deixadez de funcións tanto pola concellería de Interior como pola concellería de Medio Ambiente, é unha situación intolerable, repetitiva e irresponsable. Isto sumado aos favoritismos detectados con algúns organizadores de eventos fronte a outros, está dando lugar a unha situación inxusta, así como prexudicial para conferir a suficiente seguridade e tranquilidade á hora de realizar eventos culturais no territorio do concello de Redondela.

Por último, á nosa Agrupación van chegando queixas cada vez en maior cantidade sobre a actitude dos responsables do goberno local no referente a eventos, cultura e actividades socio-comunitarias, cara a programadores sen ánimo de lucro de diferentes lugares de Redondela. A diversos eventos estéselle negando material público aínda que este non se empregue nese momento, como pode ser o palco da Casa da Torre. Noutros casos estéselles esixindo que eses palcos contén cunha homologación que aumenta considerablemente os custes da organización do evento. O curioso é que o Concello fai uso na Casa da Torre, en pleno centro de Redondela, dun palco que non está homologado e demándalle aos organizadores de eventos nas parroquias que o seu palco, de similares características, si que o estea. AER constata a dobre vara de medir do goberno local en canto o que debería ser a promoción cultural nos diferentes lugares do territorio do concello. Por un lado veciños de primeira con cultura accesible ao longo de todo o ano sen necesidade de permisos ou organizarse para programar eventos, e por outro, veciños das parroquias que, ou se mobilizan e programan a cultura e actividades que o Concello non lles facilita, ou quedan totalmente illados culturalmente falando.

Redondela, 2 de agosto de 2016